

孔氏解六轡在手有曰每馬有二轡四馬當八轡矣諸文皆六轡者以驂馬內轡納之於軾故在手者惟六轡耳又曰車駕四馬在內兩馬謂之服在外兩馬謂之駢兩駢即驂也蘇黃門曰驂之外轡則御者執之軾與塗以轆軸之轆同即是求之則言六轡有以也

百丈

杜子美祠南夕望曰百丈牽江色注云海賦揭百丈所以牽船也連竹為之又秋風云吳檣楚柁牽百丈注云檣柁百丈皆船上器用也薛云今湖湘

間行舟以竹相續為索以引上水舟謂之百丈以謂其長可百丈今川陝猶多用之又十二月一日詩云百丈誰家上水船東坡云古離別曲百丈牽船上水遲郎去瞿塘幾日歸鍾會呼挽船索為百丈今舟子皆呼之趙云百丈者牽船筏內地謂之宣音彈余親見海商以竹劈為大瓣相續可長百丈每相續處必用漆固其絲紵使耐水即非以筏為三股四股索之類如索則今之所謂纜是也鍾會呼挽船索為百丈與薛氏相續為索之說則亦牽船之纜非此百丈也